

適園叢書

張宗祥



通國書香

吳昌碩



唐大詔令集卷第一百十二

宋 宋敏求編

政事

財利

用舊錢詔

禁鑄造銅器詔

議放私鑄錢詔

禁京城酤酒敕

行乾元重寶錢敕

行重輪錢敕

令百官議罷新錢詔

重稜錢減價行用敕

放邕府金阬敕

放天下權酒敕

減鹽價敕

條貫江淮銅鉛敕

條貫錢貨及禁采銀敕

停淄青等道糴鹽敕

財利

用舊錢詔

泉布之興其來自久實古今之要重爲公私之實用年月旣深僞濫斯起所以采乾封之號改鑄新錢靜而思之將爲未

可高祖撥亂反正爰勅軌模太宗立極承天無所改作今廢舊造新恐乖先旨其開元泉貨宜依舊施行爲萬代之法乾封新鑄之錢令所司貯納更不須鑄仍令天下置鑪之處並鑄開元通寶錢

乾封二年五月

禁鑄造銅器詔

古者作錢以通有無之鄉以平大小之價以全服用之物以濟單貧之資錢之所由急也然絲布財穀四者爲大若本賤末貴則人棄本而務賤故有盜鑄者冒嚴刑而不悔藏鏹者非倍息而不出今天下泉貨益少幣粟頗輕欲使流通焉可得也且銅者餒不可食寒不可衣也既不堪於器用又不同於寶物唯以鑄錢使其流布宜令所在加鑄委按察使申明

唐大詩令集卷一百一十二
格文禁斷私賣銅錫仍禁造銅器所在采銅鉛官爲市取勿
抑其價務利於人

開元十七年九月

議放私鑄錢敕

敕布帛不可以尺寸爲交易菽粟不可以抄勺買有無故古
之爲錢以通貨幣蓋人所作非天實生頃者耕織爲資乃稍
賤而傷本磨鑄之物卻以少而致貴頃雖官鑄所入無幾約
工計本勞費又多公私之間給用不贍永言其弊豈無變通
往者漢文之時已有放錢之令雖見非於賈誼亦無廢於賢
君況古往今來時異事變反經之義安有定耶然終自拘必
無足用且欲不禁私鑄其理如何公卿百寮詳議可否朕將

親覽擇善而從

開元九年

禁京城酤酒敕

爲政之本期於節用今農功在務廩食未優如聞京城之中
酒價尤貴但以麴蘖之費有損國儲游惰之徒益資廢業其
京城內酤酒卽宜禁斷麥熟之後任依常式

乾元元年二月

行乾元重寶錢敕

錢貨之興其來已久蓋代有沿革時爲重輕周興九府寶啟
流泉之利漢造五銖亦宏改鑄之法必今小大兼適母子相
權事有益於公私理宜循於通變但以兵戈未息帑藏猶虛
卜式獻助軍之誠弘羊興富國之算靜言立法諒在便人御
史中丞第五琦奏請改錢以一當十別爲新鑄不廢舊者冀
實三官之資用收十倍之利所謂於人不擾從古有經宜聽

於諸監別鑄一當十錢其文曰乾元重寶其開元通寶者亦依舊行用所請采鑄捉搦處置卽條件奏聞

乾元二年七月

行重輪錢敕

九府陳規百王不易或輕爲重蓋取適時以重爲輕用爲救弊則有形分龍馬勢寫刀龜子母相權變通斯在今國步猶阻帑藏未充重斂乃人困不堪薄征則軍賦未足是以頃令改鑄務於濟時自開元行用已來頗亦公私弘益今可於絳州諸鑪加樣起鑄更增新郭不變舊文每以一錢用當五十利豐費約實允事宜其錢以二十斤成貫自餘錢監並聽依舊享茲厚利足以富國人安俗阜朕復何憂仍令鑄錢使卽句當起鑄新錢或有姦濫所由奉法勿至寬容仰州縣明示

錢樣切須捉搦勿使違越在京官寮比無俸料桂玉之費將
何以堪宜取絳州新錢給冬季俸料卽仰所由申請計會支
給且艱難之際家國當同頃者急在軍戎所以久虧祿俸眷
言優恤恆媿於懷今甫及授衣略爲賙給庶資時要宜悉朕
懷

乾元二年八月

令百官議罷新錢詔

泉府之設其來尙矣或因時改作則制有重輕往以金革是
殷邦儲稍闕屬權臣掌賦變法非良遂使貨物相沿穀帛騰
踊求之輿誦弊實由斯夫易柱調絃政之要者今欲仍從舊
貫漸罷新錢又慮權衡轉資艱急如或猶循所務未塞其源
實恐物價虛騰黎人失業靜言體要用藉良圖且兩漢舊規

典章沿革必朝廷會議共體至公蓋明君不獨專法當從眾
議庶遵行古之道俾廣無私之論宜令文武百官九品以上
並於尚書省議訖委中書門下詳擇奏聞

乾元三年三月

重稜錢減價行用敕

因時立制頃議新錢且欲從權知非經久如聞官鑪之外私
鑄頗多吞併小錢踰濫成弊抵罪雖眾禁姦未絕況物價益
起人心不安事藉變通期於折衷其重稜伍拾價錢宜減作
三十文行用其開元舊錢宜與乾元錢並行用仍令京中及
畿縣內依此處分諸州待進止

上元元年九月

放邕府金坑敕

敕朕聞致理之君克勤於德不貴遠物所寶惟賢故堯設茅

茨禹卑宮室光武捨去寶劍順帝封還大珠朕以眇身獲守
丕業仰止前王之德思齊太素之風未嘗緣情於服翫措意
於珠玉庶乎捐金抵璧返樸還淳邕州所奉金匱誠爲潤國
語人於利非朕素懷方以不貪爲寶惟德其物豈尙茲難得
之貨生其可欲之心耶其金匱宜委康澤差擇清强官專句
當任貧下百姓采勵不得令酋豪及官吏影占侵擾聞奏當
重科貶俾夫俗臻富壽人識廉隅副朕意焉

大歷十四年七月

放天下榷酒敕

敕朕聞孟子曰國不以利爲利以義爲利欽若前訓賢哉是
言故務德崇賢理之先也超本棄末政之興也禹貢徵以財
賦周禮入其貨賄皆贍國用無奪人業漢接秦弊時匱費殷

置算緡之科下權酤之令郡國發姦於下公卿言利於朝賈
誼所以云天下之大殘也朕獲奉宗廟之祀永惟漳風猶聞
江淮之間頃緣兵食未足權酒收利權以救時雖廣儲蓄之
資實墮商賈之業方敦禮節漸致和平豈財悖而入與百姓
爭利者乎其轉運使下先諸道權酒宜停俾利歸於人化臻
知恥仍宣示中外知朕意焉

減鹽價敕

三代立制山澤不禁天地財利與人共之王道寢微強霸爭
行於是設祈望之守興權筦之法以佐兵賦以寬地征公私
之閒猶謂兼濟歷代遵用遂爲典常自頃寇難薦興已三十
載服干櫓者農桑其盡居閭里者杼柚其空革車方殷軍食

屢調人多轉死田卒汙萊乃專煮海之利以爲贍國之術度其所入歲倍田租近者軍費日增榷酒日貴至有以穀數斗易鹽一升本末相踰科條益峻念彼貧匱何能自資五味失和百疾生害以茲天弊實用痛傷嗚呼朕丕承列聖之緒遐覽前王之典旣不克靜事以息用又不獲弛禁以便人征利滋深疲屯重困予則不恤其誰省憂應準并峽州榷鹽宜令中書門下及度支商量裁減估價兼釐革利害速具條件聞奏削去繁刻杜塞姦訛務於利人以稱朕意

條貫江淮銅鉛敕

錢貴物賤傷農害工權其輕重須有變通比者銅鉛無禁鼓鑄有妨其江淮諸州府收市銅鉛等先已令諸道知院官勾

唐書卷一百一十二
當緣令初下未盡頒行宜委諸道觀察等使與知院官切共
句當事畢日仍委鹽鐵使據所得數勘會聞奏

元和

條貫錢貨及禁采銀敕

敕泉貨之法義在流通若錢有所壅貨當益賤故藏錢者得
乘人之急居貨者必損己之資趨利之徒豈知國計斯弊未
革人將不堪今欲著錢令以出滯藏加鼓鑄以資流布使商
旅知禁農桑獲安義切救人情非欲利然革之無漸物或相
驚已日之孚在乎消息應天下商賈先蓄現錢者宜委所在
長吏分明曉諭令其收市貨物官中不得輒令程限逼迫商
人任其貿易以求便利計周歲之後此法徧行朕當別立新
規設蓄錢之禁所以先有告示許其方圓意在他時行法不

貨朕志久定固無二言又有銀之山必有銅鑛銅者可資於鼓鑄銀者無益於貧人適開翫好之端豈救飢寒之患況欲加鑄理須併功得不權其重輕使務專一其天下自五嶺以北見采銀阬並宜禁斷恐所在阬戶不免失業委本州府長吏勸課令其采銅助官中鑄作仍委鹽鐵使卽作法優賞條流聞奏於戲人之求利厥路固殊斯道炳然言之不惑凡百有位明悉朕懷

停淄青等道糴鹽敕

兵革初寧方資權筦閭閻重困斯可蠲除如聞淄青鄆三道往來糴鹽價錢近收七十萬貫資費優贍有餘自鹽鐵使收管已來軍府頓絕其利遂使經行陣者有停糧之怨服隴畝

者興加稅之嗟犯鹽禁者困鞭撻之刑理生業者乏蠶醬之具雖縣官受利而郡府益空俾人獲安寧我節用其鹽鐵先於淄青兗鄆等道管內置小鋪糶鹽巡院納權起今年五月一日已後一切並停仍各委本道約校本年節度使自收管充軍府逐急用度及均減管內貧下百姓兩稅錢數至年終各具糶鹽所得錢并均減兩稅聞奏

長慶

唐大詔令集卷第一百十二

唐大詔令集卷第一百十三

宋 宋敏求編

政事

道釋

禁正月五月九月屠宰詔

爲殞身戎陣者立寺剎詔

道士女冠在僧尼之上詔

僧尼不得受父母拜詔

釋教在道法之上制

條流佛道二教制

禁葬舍利骨制